

Bahan asal dari Arkib  
Negara Malaysia

# Dr. Mahathir: Jangan sekali2 abaikan keluhuran kerohanian

KUALA LUMPUR, Sabtu — Kesusasteraan yang menjadi media seni para sasterawan dapat berperanan untuk mengimbangi kemajuan kebendaan dengan kemajuan kerohanian yang bersih, jujur dan berperikemanusiaan.

Demikian antara perutusan Perdana Menteri, Datuk Seri Dr. Mahathir Mohamad dalam buku cenderamata Pertemuan Sasterawan Nusantara 111 yang berlangsung di Dewan Bahasa dan Pustaka hari ini.

“Saya suka menegaskan dalam usaha kita mengejar kemajuan kebendaan, kita janganlah sekali-kali mengabaikan keluhuran kerohanian, termasuk nilai-nilai kesopanan dan budi pekerti bangsa Melayu yang tinggi,”

ujarnya.

Menurutnya, tajuk pertemuan ini — Bahasa dan Sastera Nusantara: Sejarah dan Masadepannya, amat menarik diperkatakan kerana dapat mengenang kembali kegiatan sastera dan prestasinya.

Dengan cara ini, tambah beliau, pencapaian mutu penulisan para sasterawan, sarjana pengajian Melayu serta aktivis dan pemikir sastera Nusantara dapat ditinjau dengan meninjau kemungkinan kerjasama yang lebih rapat dan berkesan di masa depan.

Karya-karya kesusasteraan serta buku-buku ilmu pengetahuan haruslah dapat mengalir dengan pesat dari satu daerah ke satu daerah lain dan dari

satu negara ke satu negara lain.

“Dengan cara ini Bahasa Melayu yang menjadi bahasa pengucapan dan penulisan sasterawan Nusantara akan menjadi lebih bererti lagi bagi kira-kira 150 juta jiwa masyarakatnya iaitu bahasa pengucapan yang terbesar di dunia,” tambah beliau.

Sementara itu Menteri Pelajaran, Datuk Dr. Sulaiman Haji Daud dalam kata aluannya berharap para sasterawan yang menghadiri pertemuan itu akan merenung ke belakang menilai pencapaian yang telah dicapai di samping menganalisa dan membuat penilaian objektif agar kecemerlangan sastera bertambah meyakinkan.